

拙
軒
集
附詞



拙

軒

集

附詞

王寂撰

中華書局

叢書集成初編

拙軒集附詞

中華書局出版發行

(北京王府井大街三十六號)

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

拙軒集目錄

卷一

賦一首

七言古詩二十六首

卷二

五言律詩四首

六言律詩二首

卷三

七言律詩二十七首

五言絕句二首

七言絕句五十一首

卷四

詞三十五首

卷五

五言古詩七首

五言排律二首

七言律詩六十七首

七言排律一首

六言絕句一首

逸句

表二首

牋二首

記四首

卷六

序三首

帖啓二首

書後三首

祭文一首

行狀一首

墓誌銘哀詞各一首

臣等謹案拙軒集金王寂撰寂字元老薊州玉田人登天德二年進士歷官中都路轉運使諡文肅金史不爲立傳元好問中州集載其詩入乙集中而仕履亦僅見梗概今以寂詩文所著年月事蹟參互攷證知寂自登第後于世宗大定二年爲太原祁縣令十五年嘗奉使往白雲治獄十七年以父艱歸明年起復真定少尹兼河北西路兵馬副都總管遷通州刺史兼知軍事又遷中都副留守二十六年冬由戶部郎出守蔡州二十九年被命提點遷東路刑獄章宗明昌初召還終于轉運使之職而集中謝帶笏表有世宗饗國臣叨預諫員語則又嘗爲諫官又有羣言交構擠臣不測之淵語而丁未肆筵詩有萬里湘纍得自新句丁未爲大定二十七年世宗本紀載是年三月辛亥以皇太孫受冊肆赦並與集合是寂之刺蔡州當以人言去國而集中情事不具其顛末莫能詳也中州集稱寂著有拙軒集北遷錄諸書今北遷錄已失傳而好問所選寂詩僅七首及附見姚孝錫傳後

一首。其他亦久佚不見。惟永樂大典內所載寂詩文尙多。雖好問所摘留別郭熙民詩諸聯及蔣一葵長安客話所紀盧植墓詩逸句。皆未見全篇。亦不能盡免于脫闕。而各體具存。可以得其什七矣。寂詩文清刻鏤露。有憂憂獨造之風。在大定明昌間。卓然不愧爲作者。金代知名之士見于中州集者。不下百數十家。今惟趙秉文王若虛二集尙有傳本。餘多湮沒無存。獨寂是編。幸于沈埋晦蝕之餘。復顯于世。而文章體格。亦足與潯南潯水相爲抗行。謹甄第裒綴。釐爲六卷。俾讀者覽其崖略。猶得以致見金源文獻之道。是亦可爲寶貴矣。乾隆四十一年二月恭校上。

總纂官侍讀學士臣陸錫熊

侍講學士臣紀昀

纂修官庶吉士臣汪如藻

拙軒集卷一

金 王 寂 撰

賦

巖蔓聚奇賦

伊合抱之巖藤。迹其生之有漸。挺標末其不凡。商世用而尤瞻。裁過馬之短策。綰維舟之長纜。斷滇池飛電之杖。組湘浦含風之簾。獨高節之擁腫。外紫紫然中歎。顧匠石之數過。不側目而一覘。有好事者非常風鑿。破長橋之蛟卵。剖巴山之猿嘯。其混然而天成。微斧鑿之可驗。彼壘石雖潔而近乎俗。金玉雖珍而幾于僭。當罇俎之勝處。惟癭君之獨占。惜流落于市井。爲時人之所厭。幸淇泉之賞音。輟酒直而見念。不然。則灰爨下之桐。而失酆城之劍。老人既歸而謀諸婦曰。我以酒隱。處身純儉。欣此物以有託。了吾生而無憾。于是撥春甕之嘈嘈。漉乳泓之湛湛。挹彼注茲。十分激盪。追顏子之瓢飲。陋管氏之反坫。咀嚼石蟹之霜螯。狼籍荷盤之菱芡。少焉既夕。風清天淡。舞月影兮徘徊。吸露華兮汎盪。已而先生徑醉也。宮錦淋漓。角巾欹墊。捲河漢于一酌。盡江湖于一蘸。洗戰國之蠻觸。弔古今之時暫。陶陶乎釋身世之編縛。浩浩乎謝功名之機陷。然後神遊八表兮。其將以躡冥鴻之背而探驪龍之頤也。

五言古詩

題寶泉軒

野人強冠襟。任事多脫略。官府逃喧卑。僧牕憩寂寞。高情渺層雲。逸興發幽壑。山色爲誰來。秋光無處著。頽紅掛浮圖。漲碧分略約。天共水相合。風催雨欲作。漁歌散汀洲。春相隔籬落。屬玉破微茫。斜書灑寥廓。幽懽殊未闕。歸興輒作惡。後會定何時。期以辛丁約。

詠張宮師二疏東歸圖〔案〕畫史會要金太子少師張汝霖善畫圖當卽所作

戰國事縱橫。廉隅初滅裂。強弱灰六籍。名教寢衰歇。卯金新典禮。蠹簡訪遺缺。人材就教育。士檢敦修潔。賢哉二大夫。夢覺槐安穴。〔案〕魏安國爲唐時故實不應引用謹附訂於此功名我何有。劍首吹一吷。約日俱移疾。乞身良勇決。兩宮贖黃金。恩遇顧不褻。送車數百兩。祖帳都門訣。冥鴻謝繒繳。天馬落羈紲。倒囊促供具。賓族相娛悅。父子以壽終。〔案〕本傳父子字乃承上文兄子而言此摘用未明併附訂於此名聲日星揭。人誰不躡步。卒莫踐其說。寥寥閱魏晉。得一陶靖節。平生腰骨硬。肯向督郵折。後世無間津。風流冷于鐵。龍眠以畫隱。游意歸往哲。嗚呼紙上影。生氣猶凜冽。宮師廊廟具。天爲蒼生設。莫襲異姓封。長揖稷與契。云何眷短幅。摸索墨漫滅。況爲山九仞。一簣功可輟。盍歸鳳巢閣。姑置鷗鵝血。方將薦廟堂。微公孰翹轡。致君堯舜上。鐘鼎載勳烈。歸艇渺烟波。晴樓醉松雪。古今雖異時。出處同一轍。款圖幸不惡。蚤

計正恐拙兩疏儻有靈抵掌冠纓絕。

題季札掛劍圖

季札貴公子軒軒氣凌雲平生會心少四海一徐君相逢適所願情話如蘭薰徐君顧長劍意欲口不云季子心許之誓將歸獻芹駐節不容久驪駒促輕分言還訪舊隱路人指新墳干將掛高木以示初意勤知己九泉下冥漠聞不聞今人交勢利輕薄徒紛紛豈惟此道絕反是爲虛文伯夷微仲尼萬古埋清芬

跋羣澤出谷圖

我家崆峒南丁年習騎射每憶逐羣麋應手相枕藉一行吏風塵此事更何暇朝來閱短幅歸興輒命駕丹青知誰歟想與二易亞看猿良獨癡失林還可訝爾軀幸無罪爾肉鮮可炙毛臍竟自賊何異猓與麋水草苟自足慎勿害農稼恐逢曹景宗數肋不汝赦

程尙書油烟墨

書生短燈檠業苦孔之卓百巧出寒餓輕煤收紙幄魚胞杵萬計得此峴崙璞墜溝終不變良質信堅確摩挲等肘印肝腎要彫琢是中自有樂未許兒輩覺堂堂地官伯胷次吞河嶽陰塵優月給拜次豈不數人生幾量辰迅景驚飛電胡爲事細碎刻意追古朴得非遊戲耳一笑供掌握區區張與李小道安足學何當獻天子毛楮全甄擲增新漢文物潤色周禮樂天章貺詞臣宛彼雲漢倬但恐醉常侍狂登御牀角和陳無已送東坡韻

坡公守餘杭。饑客傷乍遠。人生貴知己。旅退其可忍。陳三天下士。好德吾未見。垂涎嗜熊掌。擺手謝關鍵。觀過斯知仁。如月蝕輒滿。聞風激庸懦。所恨我生晚。

小兒難夫子辨并引

予奉朝命之夷門。道過太行。路左有二石像。詢其父老。云此小兒難夫子迴車之故地。予惡其虛名而無實。作是詩以辨之。

我行自并門。道出太行嶺。路傍古石人。髣髴類形影。過客互傳疑。是非竟誰請。會逢田舍翁。荷杖雪垂頤。爲問定何如。愚蒙庶幾警。云昔東家丘。歷聘入吾境。偶此值小兒。難詰豪且穎。丘也不能對。驅車返天井。邦人思其賢。想像刻頑礪。始予駭其言。噴赤發面頸。夫子聖者歟。日月揭餘炳。豈聞採樵斧。巧掩運斤郢。翁徒老于年。此事能不省。翁聞遽慨然。色厲聲亦猛。轍迹今尙存。事況傳已永。書生多大言。詭辨勿復騁。信知端木賜。下釋東野獲。正如與螻蛄。而語春秋景。小姑嫁彭郎。舉世莫能整。嗟哉吾道窮。生死何不幸。生而非其時。伐樹迹屢屏。亦嘗撩虎鬚。白刃脫俄頃。死爲萬世師。廟貌多土梗。自非二仲月。門寮終歲靜。山魃與社鬼。香火未嘗冷。此事固不平。此心嘗耿耿。吾生賦拙直。浪許近骨鯁。與物例多忤。所動坐愆省。憤世無奈何。空令氣生瘼。

七言古詩

題張信道所藏李元素淮山清曉圖

長淮宛轉淮山麓。浩蕩淮光釀山綠。側峯橫嶺巧連延。直自鍾山徹浮玉。曉來烟靄與風塵。面目參差未是真。中宵沈澀一濯洗。突兀了觀清淨身。陽鳥飛出扶桑路。卻拂羣陰披宿霧。朝暉千丈臥長虹。曙色半巖橫匹素。須臾豁壑漸分明。怪底懸崖化赤城。風傳粥板僧定出。露濕野巢鶴夢驚。玄暉舊筆絕俗韻。元素豪奪紫泥印。祇今元素入窮泉。惜哉一代風流盡。

題雪橋清曉圖

山翁臥聽溪風急。夜半篩珠落懸隙。千巖浩蕩失故態。萬徑荒寒滅人跡。擊舟欲訪戴安道。截岸層冰正堆積。翩然清興不可遏。側望招提無咫尺。攝衣便挈蠻童去。禿袖抱琴龜手漆。長橋蠟屐挂枯藤。卓破橫江玉龍脊。粥魚晨磬聲未了。扣門喚起彌天釋。開軒對榻誰賓主。呵手續絃坐搖膝。從來支許事幽尋。放意茶顛恣詩癖。虎溪相送尙遲留。更待林梢掛蒼壁。

題高敬之所藏雲溪獨釣圖

疎簾留客晝偏長。茗椀告罷新鑪香。主人不恤寒具手。爲出牙籤古錦囊。鵝溪半幅開平遠。天際歸舟烟樹晚。釣翁蓑笠釣滄浪。一波不動風絲輭。吾家舊隱柳溪間。誤落紅塵不放閒。披圖便覺清興發。恍若坐我黃蘆灣。黃陵翩翩貴公子。愛畫乞詩差可喜。幸今老父眼尙明。莫惜千金訪蘭紙。

題張運使夢景圖

點鞭長算收餘暇。忙裏偷閒真倒蔗。北牕鼻息落庭花。一榻清風不論價。平生雅志一丘壑。小夢江山猶命駕。雲低平野暗溪樹。雨淋層峯補天罅。老農市酒喚歸渡。漁伯鱸舟楓樹下。開囊檢得春草句。揮灑短軸爭膾炙。夜涼吹笛常抗衡。槐火石泉足更霸。披圖掠我倦遊興。念念尊鱸乞長假。與君田里馬牛風。蠟屐藍輿趁蓮社。畫工豈識夢中詩。他日須煩息軒畫。（案）息軒即楊祕監邦基善畫。金史有傳。

王子告竹溪清集圖

溪山佳處多荒僻。豹霧蛟涎斷人跡。縱能陟險一登賞。重繭百休疲峻陟。豈知城市有林泉。杖屨相從都咫尺。尋常四友會真率。茗具酒尊隨所適。竹風細細几席靜。花雨冥冥巾帽濕。逸休方與聖賢對。觀妙超然存目擊。吹臺名士意領略。手弄蒲葵坐搖膝。吾宗盤礴拊長松。似傷材大時難得。漳川野老氣豪邁。陪謁龍顏祗長揖。琴書笑詠有真樂。不減仙翁戲巴橘。九原死者如可作。應恨烏絲欠珠壁。蘭亭滕閣久寥落。歲月轉頭駒過隙。願君此畫更珍藏。此會他時恐難必。

跋韋偃病馬圖

開元天寶誰能畫。韓子規摹出曹霸。惜乎畫肉不畫骨。坐使驕驕減聲價。晚生韋偃非畫工。少也得名能古松。試拈秃筆掃束絹。使覺天厖無真龍。胡不寫明皇照夜白。弄驕顧影嘶長陌。又不寫太宗拳毛騮。百戰萬里輕風沙。如何寫此神俊物。剝落玄黃只皮骨。卻思落日蹴長楸。風入四蹄追健鶻。嗚呼往事今茫然。矯首有意誰其傳。主恩未報忍伏櫪。志士扼腕悲殘年。安得老髯通馬語。芻秣醫治平聲平所苦。行當

起廢一長鳴。要洗凡庸空萬古。

跋張舍人所收楊仲明天殿鐵驄圖

大宛山下汗血駒。麟鬣鳳臙龍頭顛。黑花細洒雲滿軀。倜儻不與驚駘俱。黃金絡頭老京都。注目落日思長途。圉人使箠不敢驅。似聽馬語方踟蹰。嗚呼龍媒已矣夫。林鳥恨對長風呼。誰能寫照開新圖。楊子妙筆非臨摹。願君著意收畫廚。風雨變化防須臾。迺翁丞轄翼帝車。月旦人物評錙銖。千金但賞駿骨枯。世上良馬無時無。

題高解元所藏武元直山水

(案)武元直字善夫。明昌中名士。善畫。見畫史會要。

洞清宗元不傳法。此老無乃得之心。妙畫通靈恐仙去。須防風雨夜堂深。斯人地下骨應朽。此畫世間事復有。莫與紛紛俗眼看。等閒卻作丹青手。

覺華島并引

予自少時。卽聞遼東覺華島爲人間佳絕處。凡道經海上。未嘗不駐鞍極望。久不能去。第簡書有期。不得一到爲恨。大定乙未之秋。仲月十有四日。予自白雲審理冤獄歸。投宿龍宮下院。謀諸老宿。期一往焉。老宿曰。今秋風勁。波浪洶湧。雖柁工篙師往來其間。亦不免縮頸汗背。當俟隆冬冰合。如履平地。然後可著鞭耳。予竟不聽。明日登舟。行未幾半。風濤掀簸。舟人爲之變色。予是收帆弭楫。維石于北渡。予歎曰。此而不濟。則命也。迺割牲醢酒。投是詩以禱之。遂復鼓櫓以進。已而風

停浪靜。天水湛然。極目萬里。恍然如坐大圓鏡中。指顧之間。已登彼岸。舟僧詢大德者。謂予曰。正直動山鬼。詩句起螭龍者。信不誣矣。予笑曰。如二公者。千古仰之。猶太山北斗。豈庸人末士所可擬哉。是必憐其勤而報以誠也。不然。則劉昆所謂反風滅火。蝗不入境者。皆偶然耳。雖然。此一段奇。亦不可不紀也。

宮亭湖神威且通。往來送客能分風。廣德王祠禱輒應。重樓翠阜浮霜空。我行擬上覺華島。香火遍走青蓮宮。中流未濟成齟齬。船頭西向旗脚東。雲奔霧湧白浪捲。一葉掀舞洪濤中。平生行止類如此。憑仗願有信與忠。嘗聞主海尊位置。顧豈變化難爲功。指呼蛟蜃掃陰翳。天水萬里磨青銅。解維轉舵飽帆腹。雙槳不舉追驚鴻。茲遊政要債素願。勿使坐歎詩人窮。投文再拜瀝微懇。爲我寄語白龍翁。

留題覺華島龍宮寺

傳聞三山駕空虛。珠官貝闕神仙都。茫茫弱水限舟楫。人跡不到如有無。平生點檢江山好。祇有龍宮覺華島。何年經創作者誰。興聖帝師孤竹老。老人絕俗棲金沙。歲久喜捨來天家。懸崖架壑置佛屋。突兀殿閣凌烟霞。一作開明霞。迺知造物開神異。故壓祇園布金地。四顧鯨波翼寶巖。玻璃環擁青螺髻。我生自厭薰羶腥。坐覺兩腋生清冷。夜涼海月耿不寐。幾欲舉手捫天星。明朝收帆落塵土。一夢回頭散風雨。向令坡老此經行。想不願爲天竺主。

拙軒

拙軒少也絕交朋。閉門坐斷藜牀繩。據梧手卷挑青燈。目力自足誇秋鷹。一行作吏負且乘。簡書夜下催晨興。心勞政拙無佳稱。高枕緩帶吾何曾。年來安東逐斗升。吻膠背汗疲炎蒸。到官簿領交相仍。臨事自笑無一能。督責老掾詢豐丞。日畏罪罟空凌兢。窮荒九月河水冰。玉樓凍合衣生稜。氈裘火坑寒不勝。呼吸未免髯珠凝。積憂著熱邪上騰。阿堵中有輕雲憑。臨臆射日絕可憎。決皆淚霑長沾膺。初謂造物何侵陵。細思無迺示小懲。世醫庸見浪自矜。肝膽豈易分淄澠。屏除嗜欲學山僧。此理蓋出三折肱。斯文未喪信有徵。天其使我雙明增。要作楷字頭如蠅。表乞骸骨歸丘陵。負郭二頃產有恆。堆盤苜蓿衣麤絰。醉眠牀下呼不響。自許此著高陳登。飯餘睡足揩枯藤。老眼細數雲山層。

客中戲用龍溪借書韻

太行西北雲橫目。一日九迴腸斷續。含官就養誠所願。百口煎熬食不足。逆行倒置坐迂闊。相負此生惟此腹。茲行遠去父母國。戀戀不同桑下宿。山長水遠苦愁人。不覺秋風驚鬢綠。平生拙宦失捷徑。蘭蕙當門爲誰馥。文章既不一錢直。五經安用牕前讀。東塗西抹竟何有。坐歎馬鞍消腓肉。公家無補一毫髮。鼠竊太倉饕寸祿。既無里嫗誰乞火。未有先容莫投玉。天涯懷抱爲誰開。盡寫窮愁入詩軸。

柳城西聞蟬有感

坡老放歸舟。繫汁驚聽驟鐸鳴北岸。文公嶺外得京官。照蠟壁間猶喜見。我今薄宦天一角。適以平反叨使傳。柳城西路忽聞蟬。駐馬久之增感歎。臨歧淒咽固有意。似對鄉人論半面。吾廬環木夏陰合。聒耳長

嘶吾每憶安東地。冷無此物。所以相逢香還香。晚風晨露汝易足。何苦叨叨聲不斷。商胡遷客淚橫臆。落日窮途方寸亂。朱門砧杵快新涼。乞汝秋天從叫喚。

轍中斃龜井引

予以公事按部郊行。過汚泥濁水。深不沒膝。廣可三丈許。車轍中有烏龜伏焉。首尾尺餘。予初疑曝背。舉而視之。則頭且碎矣。予謂凡物之神。無如龜者。意其含魚龍而伍蛙黾者。則必厭網罟搜羅之患。以求自安。今復死于奔輪之下。豈靈于人而不靈于已耶。抑吉凶逆定而不可逃耶。政如嵇叔夜鍛隱以避世。反見譖于鍾會。竟不免東市之刑。信乎死生有命。脩短有期。彼有不顧名節。微幸以求全者。未必然也。予作是詩。蓋有激而云。

玄夫六甲存神氣。耳息縣縣口常閉。會巢蓮葉綠毛叟。遊戲人間閱千歲。吉凶未判倘謀及。告以將來若符契。江湖佳處多網罟。側足恐爲人所制。拊牀鑽灼事交病。寧處不材從此逝。嘉林居士強解事。清江使者何經濟。泥塗雖辱固不惡。所幸此身能自衛。豈期曝背當車轍。碎首奔輪翻致斃。乃知生死有定數。萬物自然無巨細。螻蟻多寡各安分。椿菌短長均一世。越人善療卒兵死。單豹養生遭虎噬。爾今韜晦竟不免。使我追傷收寒涕。至人知命付一笑。我輩情鍾能不蔽。千古蒙莊倘有靈。須知曳尾非常計。

予以朝命催祖河朔道出隆慮邂逅楊東瞻蓋稜霞隱人也嘗許予小山以地遠卒不能致約以後期故作是詩以爲定券

嗟君學得屠龍手，走遍人間病渴口。左攜妻子右琴書，卻返棲霞老耕耦。閉門開草太玄經，冷眼兒曹事奔走。惠然過我傾傾蓋，夜對寒燈共樽酒。掀髯揮麈話平生，河漢無聲轉星斗。自言家蓄小玲瓏，坐使鑪鑊龜牛後。青生嗜好固多誕，不許千金酬敵帚。山深但恨卒未致，他日願爲吾子壽。人生尤物安用多，要與仇池爲二友。明年尺牘遺長鬚，莫爲先生化鳥有。

上周仲山少尹壽

姬公勳業千古高，雲孫間出皆時髦。篤生夫子賢且豪，風義凜凜魁吾曹。詞源萬斛何滔滔，作賦竟欲續離騷。懸知富貴不可逃，鄉人莫敢輕韓翃。長竿不肯驚儵濖，引手一釣三山鰲。命也數奇時不遭，屈爲州縣真徒勞。不容吏手如桔槔，乾沒遽止民無搔。近出幕府持旌旄，季孟伯厚胡爲叨。朱門瑤璃載羔羔，先生盤飯獨溪毛。衆人醉死貪濁醪，先生漱石羞醪糟。仕者往往爭錐刀，旣角而齒寧非饕。黃金堆丘爛巾袍，公獨視之如秋毫。迺知賢愚異所操，相去豈特九牛毛。久語世味嚼空餐，徑欲脫幘誅蓬蒿。吾君側席登襲臯，如君才氣寧容韜。蒼生渴望方噉噉，要使萬類歸甄陶。禮樂具舉弓矢戢，樂職頌德追王褒。乞身歸老隻魚舠，烟波萬頃翻葡萄。蠹書臥看橫長篙，衝烟破月時嬉遨。會逢石髓流青膏，嗅如香粳食如桃。方瞳瞭然牙齒牢，人間歲月從奔濤。久厭濁世薰腥臊，振臂一舉辭塵放。黃鶴飛去壤蟲號，髣髴碧落聞雲璈。

漕副劉師韓自遼西按田訟迴僕率僚友迎勞于郊是夕僕酒戰敗積明日師韓傳檄再三竟不復